

iwi e kiia nei ko te wiwi i nga tangata whai rawa tae noa atu ki te rawakore. He wahi tana ki tena, ki tena, a ki katoa ko te reo ngawari e taurititia mai ai e te tangata, ko te reo aroha e mariri ai te pouiri, ko te reo katakata e parea ake ai te whakatakariri. He ngakau tuwhera, he marae, he whakaiti, he pukunui ki nga mahi katoa, he ringa whakarewa i nga Minita karakia, he wahine whakapono a ngakau. Ki ana tamariki ake he koka tuturu, he hoa takaro no ratau, he hoa i nga haere katoa. Ki tana tane he wahine pono, he wahine ngakau aroha ki te papare ake i nga pukupuku a te ngakau.

Ko te ahua i a Ngati-Poron ka tau atu ki nga iwi i ko atu, i tua mai, ki nga marae katoa i tae ai raua ko tana tamaiti. Na, waiho kia tangihia ana ki te tangi-a-iwi, ki te tangi-a-ngakau a ia iwi, a ia iwi, he tangi e whaka-honore ana i to te iwi ahua.

Ehara, e Ma, he kuatau noa atu:
Moumou koe ki te rere i mua, e.

Ko Ma kei Te Pahi, kei Puputa Mama:
Aue! te whakaaroa i roto, e.

Haere korua, tikarohia atu
I taku manawa i motuhia i te ao, e.

NGA RETA TUKU MAI.

Ki nga Etita: E hoa ma, e whakamihia ana toku ngakau mo nga kupu o te Whakapono e panuitia ana ki te wharangi tua-tahi o te Pepa. Kia ora.

I tuhi atu ai ahau, he hiahia noku kia panuitia tetahi Motini e whakaaro ana ahau kia kokiritia ki te aroaro o te Hinota Pakeha i tenei tau.
Ina taua motini: -

1. I te mea he tokomaha nga tangata o te Hahi Mihingare kua kotiti ke atu ki te Hahi Ringatu, ki te Hahi Ratana, i runga i te whakaaro pohehe kei ana Hahi anake te mohio me te mana whakaora hei patu i nga mate e kiia nei 'he mate maori,' hei patu ranei i te mana tohunga maori: itemea hoki he tokomaha nga tangata e kiia nei 'he porangi' e hemo atu ana i te kainga, e tokua atu ana ranei ki te whare porangi ki reira hemo atu ai, he kore rongo no te Hahi ki nga whaka-hau a te Ariki, kua tae tenei ki te wa e tika ana kia oho ake tatou i te moe ki te mahi ki te awhina i te iwi Maori.

2. Ko te whakaaro tenei o te Hinota, me whakatu he ropu (komiti ranei) hei nini hei rapu i te tino tikanga o nga mate e patu nei i te iwi Maori-ara o nga tu mate e kiia nei 'he mate maori,' 'he rewera.' Me whaimana hoki taua ropu i raro i te